

Greetings from General Secretary

Pathian nan hngalhnak, Kan Bawipa Jesuh Khrih nan hngalhnak thawng in vel le daihnak cu nan dihlak cung ah tlamtling tein nan ta si ko seh!!!



A voi 4th CBCUSA Newsletter kan chuah khawh than ruang ah Bawipa a min ka thangthat. CBCUSA chungtel dihlak thlacamnak thawng in a voi 16th BT meeting tlamtling tein dih asi. Ruah khawh lengin tuanding biachahnak kan ngei.

Phaisa le thazang dih in BT meeting a rak kaimi local church nan dihlak cung ah lawmhnak chim ka duh. Cun hmuhmi ning in pehtlaihnak 6% a petu local church le hruaitu cung ah upatnak kan pek hna. Vel le daihnak cu nan ta si ko seh!

Chin Convention Center (2017, 2018, 2019) BT nih a fehtermi zong 2018 in phaisa thawh asi cang. 2018 caah a tho cangmi Khrifabu dihlak cung ah lawmhnak kan chim. 2018 caah a tho rih lomi nih 2019 June tiang thawh asi lai.



Ordination Interview

CBCUSA kum khat hnu kum khat puitling riantuantu an i chap. April 9-10 tiang CBCUSA Office ah minung pa 8 Ordination Interview tuah an si. CBCUSA thawkka in a tambik interview tuah an si. Bawipa a tha tuk. Khrih le miphun caah pasal tha si chin lengmang ko hna seh.



Tutan BT meeting nih Khrih le miphun caah rian lianngan ngai
1) Rakhine Yoma um Chin miphun sin ah Holistic mission rian tuan ding,
2) Halkha ah minung 3000 tluk tlum inn sak,
3) Sami khua ah Education Center sak ding,
4) Halkha ah Education Center (Boarding School) sak ding, le
5) Bible Fund ngeih ding,
6) missionaries chap ding,
7) Chin National Prayer Day tuah ding, tiah biakhiahnak nan ngeihmi a tak in a langhnak lai thawhvo zong daithlan awk a tha lo.

Pathian Sin Biakinn Chanhnak

Japan mipun umnak poh ah factory an tuah, China mipun umnak poh ah restaurant (rawl dawr) a um. Chin mipun umnak poh ah Khrifabu a um ve. Hallelujah. Mirang Church nih Biakinn an khar (closed), cu lio caan ah Chin Khrifabu nih mah le umnak cio ah Biakinn cawk asi. April 14 ah Zion Chin Baptist Church, Florence, KY nih biakinn tha taktak an cawkmi dedication sunglawi ngai in tuah asi. Member 200 hrawng an si nain, a tha ngai mi Biakinn an kan ngeih piak caah kan i lawm tuk. Bawipa nih CBCUSA thohdirhtu ah hmang chin ko hna seh.



Zion Chin Baptist Church, Florence, Kentucky
Biakinn an ngeih thar mi Pathian sin pekchanh lio

CBCUSA aa tinhmi lam tuan ah a kal khawh pengnak lai Thlacamnak le pekchanhnak in chungtel vialte nih CBCUSA hi zohkhenh hna usih. Angan a dammi local church si izuam cio hna usih. Lungrualnak, mission rian tuannak le mipun himnak caah Khuazing Pathian nih a rian thiang a kan hrawm caan te ahhin Bawipa a lawmhtertu CBCUSA le Chin mipun kan sinak lai zumhnak le thlacamnak in hmai ah fong hna usih.

Khuazing Pathian nih CBCUSA le Chin mipun thluachuah pe chin ko seh!!

Bawi Khrih ah nan tuan hawi,

T. Bawihrin

Mission Director Khuatlawnak

Mission Rian cu Krihfa kan ca ahcun kan thihri le kengruangruh bantuk asi caah tuan lo khawh lo ding a si. Cu kan tuannak ah cun Ram leng ah rian kan tuan khawhnak hnga Ram chung Krihfabu kan thawn a herh i, ram chung Krihfabu kan thawn khawh nakhnga chungtel Krihfabu kip nih Mission kong kan i fian a herh, kan i fian khawhnak hnga tawn le thazaang pek kan herh caah Mission Director cu din loin CBCUSA chungtel Krihfabu hna a tlawng thluahmah hna. January in March 24 tiang Zarh khat hmanh lawng loin CBCUSA chungtel Krihfabu a tlawng hna i, June 16 tiang khi Zarh khat hmanh lawng loin program a ngei dih cang, thlacamnak in bawm cio hna usih.

Kawram ICBM Riantuannak

Kawram lei ICBM missionary hna le Nurse Aides hna zong din lo in heh tiah an tuan cuahmah ko hna. Paletwa peng ah cun AA le Kawl Ralkap i kahnak lak ah an nunnak thaap in rian an tuan hna. US \$125000.00 dih in Paletwa khua ah Paletwa Baptist Association Office le ICBM Center kan sak mi hna cu PBA kum 50 tlinnak Jubilee puai lio, March 2, 2019 ah sunglawi ngai in Pathian sin pekchanhnak an tuah khawh. Paletwa kan unau hna he kan i pehtlainak le dawtnak a fehtertu a si.



PBA Office (left) le Mission Center (right)



A voi 16-nak CBCUSA BT meeting ah Kawlram Mission riantuannak report pe ding in Myanmar Director Rev. Thla Tin Thang cu March 14, 2019 ah damtein USA a rak phan. Myanmar Director hi Zokhua Area Baptist Association nih March 24, 2019 ah Ordination an pek mi a si. BT meeting lio ah Thawngtha chimnak caan zong pek a si i, lunglawmhnak tampi a ngei. Kawlram lei riantuan awk a tam tuk ruang ah US ah zarh hnih fai te lawng a caam hnu ah April 3, 2019 ah tluang te in Kawlram ah a tlung colh cang.



Hakha ah kan zoh mi hna High School siangngakchia chung in 27 nih Taang 10 camipuai an phit, mitampi an awn khawhnak hnga thla campiak hna usih. Nikum ah Distinction 4 a hmu mi Pa Aung Naing Win zong Taunggyi University ah Sibawi a cawng lio cang, ti kan theih.

CBCUSA nih Kawlram Mission headquarters Hakha, Chin State ah "Mission Center" sak ding tiah BT zong nih hnatlaknak a ngeih cang mi he pehtlai in Hakha Christian Ministers Fellowship sinah kan halmi hna hmun Acre 5 cu March 2019 ah saknak nawl an kan pek cang caah Pathian kan thangthat. Hi Center saknak caah BT nih US \$150000.00 zong hnatlak cia mi a si caah Ni le Caan zoh in tuan ah thok khawhnak ding in thlacam hna usih. Hi project hi tuan deuh ah cun Mission Center ti a rak si nain Center lawng si lo in High School, Guest House le siangngakchia umnak hostel kemh chih ding in timhlahm a si, phaisa zong tam deuh a dih kho mi a si, thlacam in Bawipa kan nawl a herh ko.

BT Meeting Lio Cauk Zuar

CBCUSA a vawi 16-nak BT Meeting, Emmanuel Chin Baptist Church, Columbus, Ohio nih khual an kan bultawl ning cu lawmh lo awk an tha lo. Airport ah khual an don an thlah hna ning, riahnak hotel ah zing 7 hlan ah ready in bus a dir cia dih ning, an rawl phun a tam ning le an rawl thawt ning, an biakinn sak thar mi ah camera an bunh ning le angle phunphun in hmanthlak an thlak khawh dih ning, mino le upa anmah le an zawn in an cawlcangh dih ning zoh ah fel tuk in an i timlam, ti hmuh fian ngai an si. Christian Education & Literature Department nih an mino cauk zuar an fial hna i, \$1445 an hmuhpiak hna. BT meeting dongtu ECBC cung le cauk zuar ah a rethei mi an mino hna cung ah CELD cu lawmhnak chim cawklo a ngei.

